



Broj: 06-1-07-1-4653/22  
Sarajevo, 23.11.2022. godine  
F.S.



Na osnovu člana 2.9 stav (1) tačka 14, a u vezi člana 1.10 stav (1) tačka 1. i stav (2) i člana 13.10 stav (2) Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22 i 67/22), člana 11. i 15. Uputstva o dodjeli i prestanku mandata ("Službeni glasnik BiH", broj 27/22), te člana 25. stav (3) Statuta Grada Sarajeva („Službene novine Kantona Sarajevo“, br. 12/98, 14/98, 25/05, 23/08, 32/08 i 34/08), u pravnoj stvari prestanka mandata Hašimbegović Marijele, vijećnice u Gradskom vijeću Grada Sarajeva, Centralna izborna komisija Bosne i Hercegovine je na 86. sjednici, održanoj dana 23.11.2022. godine, d o n i j e l a

## O D L U K U

### o prestanku mandata i dodjeli mandata sljedećem kvalificiranom kandidatu

- (1) **Hašimbegović Marijeli**, vijećnici u Gradskom vijeću Grada Sarajeva, izabranoj na posrednim izborima 2020. godine sa kandidatske liste GRUPA VIJEĆNIKA „HAŠIMBEGOVIĆ MARIJELA“ za posredne izbore vijećnika u Gradsko vijeće Grada Sarajeva iz Općine Novo Sarajevo, utvrđuje se prestanak mandata sa danom 09.11.2022. godine.
- (2) Upraznjeni mandat iz stava (1) dispozitiva ove Odluke dodjeljuje se **Pleše Robertu**, kandidatu sa kandidatske liste političkog subjekta NAŠA STRANKA, za Općinsko vijeće Novo Sarajevo.
- (3) Pleše Robert dužan je postupiti u skladu s članom 1.3a stav (3) Izbornog zakona BiH i u roku od sedam dana od dana prijema Izjave o prihvatanju/odbijanju mandata istu čitko popuniti i dostaviti Centralnoj izornoj komisiji BiH.
- (4) Ukoliko Izjava iz stava (2) ne bude dostavljena u navedenom roku, smatrat će se da je kandidat odustao od mandata, te će se mandat dodijeliti narednom kvalificiranom kandidatu sa liste.

### O b r a z l o ž e n j e

Gradsko vijeće Grada Sarajeva dostavilo je Centralnoj izornoj komisiji Bosne i Hercegovine, dana 09.11.2022. godine, obrazac za utvrđivanje prestanka mandata izabranom članu tijela vlasti, propisno ispunjen od strane vijećnice Hašimbegović Marijele, te potpisan i od strane predsjedavajućeg Gradskog vijeća Grada Sarajeva, a kojim je Hašimbegović Marijela, dana 09.11.2022. godine, podnijela zahtjev za utvrđivanje prestanka mandata vijećnika u Gradskom vijeću Grada Sarajeva, a iz razloga prihvatanja mandata zastupnice u Skupštini Kantona Sarajevo, kako je u obrascu navedeno.

U telefonskom kontaktu sa Hašimbegović Marijelom potvrđena je vjerodostojnost i svojevrijednost podnesenog zahtjeva za utvrđivanje prestanka mandata u Gradskom vijeću Grada Sarajeva, u skladu sa članom 2.9 stav (1) tačka 14. Izbornog zakona Bosne i Hercegovine.

Odredbama člana 1.10 stav (1) tačka 1. Izbornog zakona Bosne i Hercegovine utvrđeno je da izabranom članu organa vlasti na svim nivoima prestaje mandat prije isteka vremena na koje je izabran danom podnošenja ostavke.

Hašimbegović Marijela je u Gradsko vijeće Grada Sarajeva izabrana sa kandidatske liste GRUPA VIJEĆNIKA „HAŠIMBEGOVIĆ MARIJELA“ za posredne izbore vijećnika u Gradsko vijeće Grada Sarajeva iz Općine Novo Sarajevo, iz reda hrvatskog naroda.

Članom 22. stav (2) i stav (3) Statuta Grada Sarajeva („Službene novine Kantona Sarajevo“, br. 12/98, 14/98, 25/05, 23/08 i 32/08) propisano je da svako općinsko vijeće općina koje čine Grad Sarajevo bira po sedam delegata u Gradsko vijeće iz reda općinskih vijećnika, te da će Bošnjacima, Hrvatima i Srbima, kao konstitutivnim narodima, pojedinačno biti garantiran minimum od 20% mjesta u Gradskom vijeću, a grupi Ostalih najmanje 2 (dva) mjesta, bez obzira na izborne rezultate.

Članom 25 stav (1) Statuta Grada Sarajeva propisano je da se zamjena za gradskog vijećnika kojem je prestao mandat prije isteka mandata gradskog vijećnika vrši sa kandidatske liste općinskog vijeća na kojoj se nalazio vijećnik kome je mandat prestao.

Odredbom člana 25. stav (2) Statuta Grada Sarajeva propisano je da u slučaju da je lista iz stava (1) istog člana iscrpljena, odnosno u slučaju da se izborom sljedećeg gradskog vijećnika s te kandidatske liste narušava minimalna zastupljenost naroda u Gradskom vijeću, predlagač kandidatske liste, predlaže dopunsku kandidatsku listu općinskom vijeću s općinskim vijećnicima kandidatima za Gradsko vijeće iz reda naroda čiju je minimalnu zastupljenost u Gradskom vijeću potrebno ponovo osigurati.

Odredbom člana 25. stav (3) Statuta Grada Sarajeva propisano je da ukoliko predlagač iz stava (2) istog člana ne može sačiniti dopunsku listu sa kvalificiranim kandidatima iz reda općinskih vijećnika, za Gradsko vijeće će se delegirati općinski vijećnik pripadnik navedenog naroda koji je na lokalnim izborima dobio najveći broj glasova među kvalificiranim kandidatima, bez obzira na to kojim stranci, koaliciji ili listi nezavisnih kandidata pripada.

Broj članova Gradskog vijeća Grada Sarajeva iz reda hrvatskog naroda, prestankom mandata vijećnice Hašimbegović Marijele, iznosi 5 članova, a što narušava garantirani minimum iz člana 22. Statuta Grada Sarajeva, iz kojeg razloga sljedeći kandidat za izbor u Gradsko vijeće Grada Sarajeva treba biti iz reda hrvatskog naroda.

Uvidom u Odluku Centralne izborne komisije Bosne i Hercegovine, broj 06-1-07-3-113/21 od 02.02.2021. godine, kojom je ovjerena kandidatska lista GRUPA VIJEĆNIKA „HAŠIMBEGOVIĆ MARIJELA“ za posredne izbore vijećnika u Gradsko vijeće Grada Sarajeva iz Općine Novo Sarajevo, utvrđeno je da je ista lista iscrpljena, odnosno da na istoj listi više nema neizabranih kandidata.

Daljnjom provjerom u službenim evidencijama utvrđeno je da u Općinskom vijeću Novo Sarajevo nema izabranih vijećnika iz reda hrvatskog naroda, a koji se ne nalaze na ovjerenim listama za posredne izbore u Gradsko vijeće Grada Sarajeva, te da iz tog razloga predlagač nije u mogućnosti predložiti dopunsku kandidatsku listu općinskom vijeću s općinskim vijećnicima kandidatima za Gradsko vijeće Grada Sarajeva iz reda naroda čiju je minimalnu zastupljenost u Gradskom vijeću potrebno ponovo osigurati, iz člana 25. stav (2) Statuta Grada Sarajeva.

Nadalje, provjerom u službenim evidencijama, utvrđeno je da dvije kandidatske liste za posredne izbore vijećnika u Gradsko vijeće Grada Sarajeva iz Općine Novo Sarajevo, koje je ovjerila Centralna izborna komisija Bosne i Hercegovine, imaju po jednog kandidata iz reda hrvatskog naroda, te da isti kandidati još uvijek imaju mandat vijećnika u Općinskom vijeću Novo Sarajevo, a to su kandidatska lista GRUPA VIJEĆNIKA „KORORA I OSTALI" i kandidatska lista političke stranke „NAŠA STRANKA“.

Uvidom u Odluku Centralne izborne komisije Bosne i Hercegovine o potvrđivanju i objavljivanju rezultata Lokalnih izbora u Bosni i Hercegovini 2020. godine, broj: 05-1-07-1-2100-1/20 od 15.12.2020. godine („Službeni glasnik BiH“ broj: 81/20), utvrđeno je da je vijećnik iz reda hrvatskog naroda u Općinskom vijeću Novo Sarajevo koji je dobio najveći broj glasova na Lokalnim izborima 2020. godine, 788 glasova, Robert Pleše, kandidat političkog subjekta NAŠA STRANKA.

U vezi sa svim navedenim i na osnovu člana 13.10 stav (2) Izbornog zakona Bosne i Hercegovine i člana 25 stav (3) Statuta Grada Sarajeva, mandat vijećnika u Gradskom vijeću Grada Sarajeva dodjeljuje se Pleše Robertu, sljedećem kandidatu sa kandidatske političkog subjekta NAŠA STRANKA, za Općinsko vijeće Novo Sarajevo.

U skladu sa navedenim, Centralna izborna komisija Bosne i Hercegovine je, na osnovu člana 2.9 stav (1) tačka 14, člana 1.10 stav (1) tačka 1. i stav (2) i člana 13.10 stav (2) Izbornog zakona Bosne i Hercegovine, člana 11. i člana 15. Uputstva o dodjeli i prestanku mandata i člana 25. stav (3) Statuta Grada Sarajeva, odlučila kao u dispozitivu ove Odluke.

**Pravna pouka:** Protiv ove odluke dozvoljena je žalba. Žalba se podnosi Apelacionom odjelu Suda Bosne i Hercegovine u roku od dva dana od dana prijema ove odluke preko Centralne izborne komisije Bosne i Hercegovine, u skladu sa članom 6.9 stav (1) i stav (2) Izbornog zakona Bosne i Hercegovine.



Dostavljeno:

- Hašimbegović Marijela,
- Pleše Robert,
- Gradsko vijeće Grada Sarajeva, nakon pravomoćnosti,
- a/a.